

## Kei Te Haere Au

nā Tipene Watson

Amokura

### He Whakatau

Me mātua pānui kia mārama rawa koe ki ngā whārangi 8–14 o tēnei pukapuka.



### He whakarāpopoto

Pānuitia te whakarāpopoto ki te ākonga. Ka haere te kōtiro mā runga paihikara. Kei te haere ia ki hea?

### He kupu whakataki

Kia kaha ki te whakamahi i ngā wheako, me ngā mōhio o ngā ākonga. Kia hāngai tonu te whakatenatena, ki te whakauru i ngā ākonga katoa. Me whakatītina rawa te pūkenga tiro whakamua. Matapakihia ngā kupu hou me te āta whakamahi i te papa kupu me ngā whakaahua kei te uhi. Me whakamaumahara hoki te ākonga ki te pātai i a ia anō i te wā e pānui ana ia mai i te tīmatanga ki te mutunga o te pānui.

E mōhio ana te ākonga ki te taraiwa paihikara? Matapakia ngā āhuatanga e mōhiotia ana e te ākonga ki te taraiwa paihikara. He pai tēnei mahi ki te ākonga?

### He Matapaki

Tirohia te pai o te pānui a te ākonga

I te wā o te matapaki me pānui te ākonga i te katoa, i tētahi wāhanga noa iho rānei, o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tataua i ngā hē), te rere o te reo;
- titiro mēnā e mārama ana mā te whai i tētahi o ngā huarahi e whai ake nei:
  - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
  - te pātai mō tētahi āhuatanga o te pakiwaitara, arā, te kaupapa, te ritenga, ngā ariā mātua, te raupapatanga, ngā kiripuaki;
  - te whakatenatena i te ākonga ki te titiro ki mua, ki te matapai hoki, i te wā o te whakataki.

### Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini kōpae puoro, i tōna kotahi rānei;
- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

### He whakapuaki māramatanga

1. I haere te kōtiro ki whea?
2. Mā hea tana haere?
3. He aha te tikanga o te pōtae mārō?
4. Ka hikoi haere koutou ko tōu whānau ki whea?
5. He pai ki a koe te eke paihikara?

### Ngā whakautu ki ngā whakapuaki māramatanga

1. Ki te papa tākaro, toa, kura, kōhanga reo, whare, kāinga.
2. Mā runga paihikara.
3. He taputapu hei tiaki tō upoko ina tūtuki koe i tētahi mea.
4. Ka rerekē ngā whakautu.
5. Ka rerekē ngā whakautu.

### He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te Tirohanga Whānui mō ngā tino āhuatanga o te pukapuka nei.

### Te pūtake

**T** He rapu mōhio mai i te tuhinga paki.

### He whakatakinga ā-roro, he whakaharatau

I mua i te pānui i te pukapuka, matapakia tēnei mahi te taraiwa paihikara. Me aha te ākonga ki te taraiwa paihikara? I haere ngā ākonga ki whea? Tuhia ngā rerenga kōrero. Tāutuhia ngā kupu waiwai me ngā pū tuatahi o ia kupu. Matapakia ētahi o ngā tikanga e pā ana ki te taraiwa paihikara.